

李文襄公奏疏

李文襄公奏疏目錄

題稿卷之首

督浙

恭報到任日期

計典屆期

請修戰船

核減馬價

李文襄公奏疏卷首

男 鍾麟編次

恭報到任日期疏

總督浙江等處地方軍務兼理糧餉兵部右侍郎兼  
都察院右副都御史臣李之芳謹

奏爲恭謝

天恩謹報微臣到任日期事竊臣一介庸愚仰荷

皇恩不次擢用畀臣以浙督重寄臣拜

命之日殊深惶悚復蒙

皇上頒賜御宴暨

內廐良馬披領弓矢表裏

寵賚隆渥

天語優容臣俯承感激自念捐糜踵頂不足報

皇恩之萬一臣自八月初一日

陛辭卽於次日出京銜

命南行至十月十三日抵浙江嘉興府境隨准署理總督

事務撫臣田逢吉咨委糧儲驛傳道叅議劉昌臣標

下中軍副將王廷梅齎捧

欽頒總督浙江康字二千二十四號關防一顆

今旗牌十面柙副及文卷到臣當卽恭設香案望

關叩頭謝恩於本月十五日赴省到任受事訖伏念微臣  
以樗櫟庸材荷叨劇煩重任惟有飲冰茹蘗砥礪身  
心恪持廉法董率所屬文武各官鞏固地方愛養百  
姓以圖仰副

皇上軫念東南重地至意并上報

朝廷優遇

隆恩臣謹恭謝

天恩并將到任日期繕疏奏

聞伏乞

皇上睿鑒施行

康熙十二年十月十六日奏奉

旨該部知道

計典屆期疏

總督浙江等處地方軍務兼理糧餉兵部右侍郎兼都察院右副都御史臣李之芳謹

題爲

計典屆期已迫等事臣查吏部咨開在外官員

大計文冊應於康熙十二年十二月內齎到等因欽遵在案該臣看得三年

計察澄清吏治關係黜陟今臣於十月十五日蒞任計冊例應十二月到

京一切屬員臧否旣未洞悉於平時何以定評於一日

查康熙九年川湖督臣蔡毓榮緣受事日淺請

勅撫臣獨任

計冊當經部覆奉

旨俞允與臣事例相符伏祈

皇上勅下該部院將康熙十二年考察大小各官五花賢  
否文冊聽撫臣田逢吉造送部科察核准臣今屆免  
造至於不肖官員臣採訪有據卽不時另疏糾察斷  
不敢稍有徇庇臣謹具

題伏乞

皇上睿鑒施行



康熙十二年十月十六日題奉  
旨該部知道

請修戰船疏

總督浙江等處地方軍務兼理糧餉兵部右侍郎兼都察院右副都御史臣李之芳謹

題爲請修戰船以資防剿事據浙江布政司布政使陳秉直呈詳到臣該臣看得浙省爲瀕海重地戰船爲防禦要需今據該司詳稱各船自康熙九年修造迄今已歷三載查與修造年分之例相符今據開報寧台溫三區修造戰船一百三十三隻除請畱存戰船銀兩又變價船銀共抵用銀錢二千三百五十三兩四錢零畱爲採辦物料外尙書該工料價銀四萬六

千二百一十兩六錢零此皆照例核明之數亟須修理以資海防叩乞

皇上俯念邊疆重務准照例於康熙十二年地丁銀內動用庶船工便於速竣用備緩急不致臨期有誤軍機矣臣謹會疏密

題伏乞

皇上睿鑒施行

康熙十二年十二月二十二日題奉

旨該部議奏

核減馬價疏

總督浙江等處地方軍務兼理糧餉兵部右侍郎兼都察院右副都御史臣李之芳謹

題爲請定歲終奏銷以肅馬政事據浙江布政司布政使陳秉直詳報到臣該臣看得浙省各鎮協營康熙十一年並十年購買馬匹一案經前督臣劉兆麒具疏

奏報部議以所買馬價比江南提標馬價浮多請

勅核減造冊等因隨即經備行布政司遵照部駁各款逐一查明核減造冊去後今據該司詳報動支康熙十

年分朋銀購馬二百三匹共核減二百二十四兩二錢又動支康熙十一年分朋銀買馬二百七十二匹今核減三百四十兩七錢至於各營康熙十年分買馬二百三匹未經開明價值緣由查馬價銀兩原係動支康熙十年朋銀購買卽於十年朋椿

奏報冊內註明在案今據該司備造清冊前來臣謹具題伏乞

皇上睿鑒施行

康熙十二年十二月二十二日題奉

旨該部知道

卷首終

李文襄公奏疏目錄

題稿卷之一

督師

請開銷試放火藥

請增設兵馬

飛報閩變一

飛報閩變二

飛報閩變三

續報閩變並陳調度事宜

請照例支給官兵行糧

續報各路塘報情形

請調江南援兵

題報耿逆潛遣奸細投書

彙報官兵堵擊情形

常開報捷

請用原任鎮臣李榮

密報官兵堵擊情形

亟請應援滿兵

密報賊情

金衢獲捷

衛嚴擊賊恢復壽昌縣

紹興仙居黃巖獲捷



李文襄公奏疏卷一

男 鍾麟編次

請開銷試放火藥疏

總督浙江等處地方軍務兼理糧餉兵部右侍郎兼都察院右副都御史臣李之芳謹密

題爲欽奉

上諭事康熙十三年正月初七日准兵部密咨內開照得近聞雲南省作亂各該地方官員嚴加固守該管地方內如有不端之人着嚴加查拏爲此通行直隸各省督撫提鎮一體遵行等因准此又准兵部咨開竊

照逆寇吳三桂作亂已發大兵進剿不日殲滅無足  
爲慮但江南浙江等處以及京口俱逼近海濱此等  
地方亦宜預令備防應行該省總督將軍提督嚴飭  
近海沿江鎮將等官整備兵馬船隻勤加偵探嚴行  
隄防以保無虞可也等因到臣准此遵卽一面通行  
各鎮將一體遵行外隨卽分檄申飭各該地方文武  
等官凡係沿邊近海江湖要隘衝險郡邑以及寨堡  
墩臺水陸港口補葺坍塌安設銃砲整齊馬步甲械  
飭備戰哨船隻至於一切橋梁道路師旅經由處所  
在在修整嚴行各營將弁簡練兵士以資剿禦惟慮

銃砲一項必須先加試放動用火藥正在繕疏

題請間隨准提督臣塞白理咨開照得浙江沿海二十餘里一交春汛南風日勁賊踪乘帆而至瞬息千里頃刻登犯在我守禦之具惟恃火攻所以沿海衝險之城邑要害之臺寨與夫水陸港口巡哨戰船向來俱設銃砲必常用火藥試放砲與藥習方無箍碎鐵炸之患人與砲習庶免倉皇失措之虞今以年久未經試放之火砲潮溼銹結必至手足不應恐誤封疆不得不咨請本部院沿海火砲必按季試放開銷火藥緩急庶乎有濟然事關錢糧緊急軍需務祈本部

院速爲具

題等因准此又據定海鎮總兵官朱萬化等各咨呈同  
前事等因各到臣該臣看得浙省原屬邊海重地與  
腹裏營伍不同賊孽一日未靖則勦禦一日難疎從  
來制敵之具攻堅擊遠取勝最速者惟銃砲爲軍中  
首資第緣年來操演火藥不准開銷因而久不試放  
銹澀堪虞一有警急不准倉卒洗試無補緩急抑且  
火器兵丁盡屬生手是有銃砲與無銃砲等耳况臣  
屬沿邊上下延袤二千餘里凡海口之險汎山澤之  
要衝郡邑城垣烽墩臺寨以及水師戰艦無處不加

佈置則亦無處不需砲火雖向奉部文令地方設法  
操演但弁兵傳佈無多難以責成今該鎮將因臣申  
飭預備至再至三是以皆爲試放火藥無出紛紛呈  
請臣身任地方目擊軍中急需何敢因循貽誤竊議  
目前先將各處銃砲逐一試放一次使其疏通火門  
臨期便於應手嗣後仍於每年春秋兩季試演二次  
所用火藥核明定數統俟歲終彙冊奏銷仰懇

皇上俯加垂鑒

特賜允行裨益殷鑒誠非淺鮮臣謹會同浙江撫臣田逢  
吉提督臣塞白理合詞密

題伏乞

勅部議覆施行

康熙十三年三月初四日題奉

旨該部議奏

請增設兵馬疏

總督浙江等處地方軍務兼理糧餉兵部右侍郎兼都察院右副都御史臣李之芳謹密

題爲浙省汛廣兵單亟請添設兵馬以備防守以固疆圉事准提督臣塞白理咨又據定海鎮總兵官朱萬化黃巖鎮總兵官阿爾泰溫州鎮總兵官祖宏勳平陽鎮總兵官蔡朝佐各咨呈又據杭協副將陳世凱署太湖營遊擊馬起龍沿海城守副將羅萬里等各呈詳到臣該臣看得浙江一省向爲邊海重地原設經制官兵皆係酌量形勢按地設汛本難減少邇年

海警稍息次兵省餉在無事之時分佈十一府七十  
六州縣沿海各汛臺寨以及戰船水師地廣兵單實  
苦不敷前督臣劉兆麒兩次具疏

題請未蒙

俞允但海逆窺伺時刻須防今值滇逆反叛賊氛未靖尤  
慮聞風蠢動浙地爲閩省門戶又爲江南後援先事  
之謀惟在厚集兵力見准部文奉有各該地方嚴加  
固守之

旨臣忝膺重任敢不悉心籌畫如寧紹台溫等府皆沿海  
重汛賊踪飄忽靡常水陸險要亟宜添防衛嚴金等



處界連江西福建地勢衝險杭嘉湖三府接壤江南  
環海濱湖巡防並急各鎮協營日日呼籲增兵臣與  
撫臣提臣再四面商非不知增兵必須計餉當茲軍  
興浩繁正宜爲

國節用但臣身在地方目擊兵馬不敷若不預爲上

請直至臨事張皇顧此失彼雖身任重咎無益於事查浙  
省與江南閩粵並屬海疆形勢相等而往年裁減兵  
馬浙省爲數過多今臣不敢議復原額致費糧餉謹  
就汛地緩急逐一會同詳酌實有萬不可已者議將  
各鎮協營兵單備寡之處量復兵丁三千六百三十

九名以足分防之用更請按馬一步九之制除應減  
二十七匹抵給外應增馬九百七十四匹至若臣標  
三營提標五營皆有應援通省之責與鎮營固守一  
方者不同見今戰馬無多實不堪資應援查鄰近江  
南一省總督總漕提督三標均係馬三步七浙省同  
屬要地豈可獨令單寡今議於督撫二標酌復馬二  
步八以備隨方策應按計兵數應增馬八百六十九  
匹庶可聯絡佈置使在在有備一遇警息相機堵剿  
不致有誤軍務臣總從封疆起見不得不剴切上

請仰祈

皇上俯念邊海巖疆特賜

俞允俟賊氛寧靜之日仍議裁減以節財賦除將督提二  
標及各鎮協營地方形勢增設兵丁馬匹數目備造  
清冊揭送兵部外臣謹會同撫臣田逢吉提督臣塞  
白理合詞密

題伏乞

皇上睿鑒勅部速爲查議施行

康熙十三年三月十六日題奉

旨戶兵二部會同議奏

飛報閩變第一疏

總督浙江等處地方軍務兼理糧餉兵部右侍郎兼都察院右副都御史臣李之芳謹密

題爲飛報事康熙十三年三月二十九日准提督臣塞白理咨開本月二十七日准平陽鎮總兵官蔡朝佐飛報內開本月二十二日申時據福建桐山營遊擊孫斌爲飛報靖藩兵變事內稱康熙十三年三月二十一日午時有靖藩差人持發令諭一道內開總統兵馬上將軍令諭桐山營遊擊孫斌本藩倡義起兵爾文武將吏夙抱雄才向有同心諭到之日仰體本

藩爲民至意各將所部兵民嚮應歸誠齋繳勒印換給其一應管轄地方照舊管轄務期束兵安民共立功勳本藩察敘勤勞另行從優擢用毋得故違取罪特諭甲寅年三月十六日等因昇職不勝髮指隨斬使焚諭外事關變道理合飛報亟請

題勦等情前來據此除嚴飭汛防各將領督率官兵加謹巡防協力堵禦外擬合飛報等因到本提督准此爲照靖藩兵變事出意外雖據飛報未知情形虛實本提督見在整搦兵馬會商堵禦外仍乞本部院迅檄各該鎮將嚴兵固守其衛屬江山清湖楓嶺一帶

係浙閩大路乞卽就近酌撥勇敢官兵先行飛馳堵禦以防侵犯等因又據黃巖鎮總兵官阿爾泰溫州鎮總兵官祖宏勳報同前由各到臣該臣看得浙省與閩疆接壤溫衢二府尤屬衝要孔道今准提督臣塞白理咨會准平陽鎮總兵官蔡朝佐報稱據福建桐山營遊擊孫斌飛報等語事出意外未知情形虛實見在整搦兵馬會商堵禦仍迅檄各鎮將嚴兵固守其衢屬江山清湖楓嶺一帶請酌發官兵飛馳防守等因前來臣卽一面飛飭溫州平陽二鎮衢州瑞安二協星飛率領官兵固守要隘偵探確信并行各

屬文武嚴謹整備一面會同提督臣塞白理統率官  
兵相機防禦外合先據報上

聞續有情形容臣另疏

題報臣謹會同撫臣田逢吉合詞密

題伏乞

皇上睿鑒施行

康熙十三年三月二十九日題奉

旨兵部知道

飛報閩變第二疏

總督浙江等處地方軍務兼理糧餉兵部右侍郎兼都察院右副都御史臣李之芳謹密

題爲飛報事康熙十三年三月三十日據平陽鎮總兵官蔡朝佐咨呈本年三月二十二日申時據福建桐山營遊擊孫斌飛報靖藩兵變當卽飛報各衙門及臨近鎮協外一面差兵前赴福建揆聽去後本月二十四日戌時據揆兵盧應海吳承美回稱應海承美奉差於本月二十三日到福寧交界荻荅寨揆聽路上緊急不放人行只得回至桐山進見孫遊擊卽叫



進內衙分付靖南於三月十五日會齊兵馬派守七  
門砲火爲號頭一砲上城第二砲刀出第三砲放槍  
通用吳三桂旗號十六日差官三個到小福州割辦  
摘纓有船數千隻盡泊閩安鎮有鄭錦兄弟帶船一  
鎮已到三盤洋停泊等語理合密報等因到臣該臣  
看得閩省變亂臣准提督臣塞白理咨竝三鎮塘報  
事關重大卽時據報上

聞一面與提督臣塞白理會商各自統率官兵相機堵禦  
一面飛飭平陽鎮總兵官蔡朝佐領兵前往分水關  
一路衢州副將李承恩領兵前往仙霞嶺一路先據

關隘嚴謹防守并行各屬文武官保固地方預辦糧草及沿海各鎮營加意偵備外因思衢屬仙霞關係浙閩大路最爲鄰近差員星馳往探尚未回覆於三月三十日亥時又據平陽總兵官蔡朝佐飛報密遣兵丁往福寧州交界偵探回稱前途阻絕情形及桐山營遊擊孫斌面囑之語臣查由閩至浙陸路則衢屬之江山最爲衝要處屬龍泉等處溫屬平陽等處皆有通途捷徑水路則自平陽溫州黃巖台州象山寧波定海以至杭紹嘉三屬皆邊海要地今據稱構連海逆以圖分頭入犯臣等見在隨方調度星馳固

守但各鎮營汛處處宜防無可抽調僅有督提二標官兵水陸策應深慮防守不敷仰祈

皇上俯念邊情緊要亟賜

睿裁并請先

勅江南省滿漢官兵調集兩省交界之地以資聲援江西省於廣信駐宿重兵以防崇安大關一路或有警急許臣咨調策應臣謹會同浙江撫臣田逢吉提督臣塞白理合詞密

題伏乞

皇上睿鑒施行

康熙十三年四月初一日題奉

旨兵部知道

飛報閩變第三疏

總督浙江等處地方軍務兼理糧餉兵部右侍郎兼都察院右副都御史臣李之芳謹密

題爲飛報事康熙十三年四月初三日據黃巖鎮總兵官阿爾泰密報到臣該臣看得閩逆耿精忠背

恩倡亂臣節據塘報先經兩疏上

聞今又據黃巖總兵阿爾泰密報准平陽總兵蔡朝佐報開據千總馬寧差稱揆得桐山營兵丁索餉遊擊孫斌帶往福寧州請發及至該州圍城兵馬盡赴福州止餘空城等語又詢據逃回民人馬尾稱三月十九

日耿逆等差人到吳總兵處索印取辦吳總兵不從  
二十日有亂兵陳英倡首架砲圍門搶去軍器馬匹  
逼發餉銀勒去印信辭子隨搶掠城中等語臣聞之  
不勝髮指又據金衢嚴道稟稱福建楓嶺一帶塘兵  
於三月二十六日盡行撤去則是福寧等處亦已有  
變衢州仙霞關係通閩大路又有常山亦係通途最  
爲衝要衢協額兵甚少非得重兵駐守實爲可虞溫  
屬之分水關與福寧州最近平陽總兵水陸難於兼  
顧處屬各邑通閩山路頗多處協額兵不敷防守臣  
等見經多方調度竭力防禦但各屬皆汎廣兵單而

陸隘海邊處處宜防伏乞

皇上睿裁迅發大兵刻期前來以資援剿庶保無虞臣謹  
會同浙江撫臣田逢吉提督臣塞白理合詞密  
題伏乞

皇上睿鑒施行

康熙十三年四月初三日題奉

旨兵部知道

續報閩變并陳調度事宜疏

總督浙江等處地方軍務兼理糧餉兵部右侍郎兼都察院右副都御史臣李之芳謹密

題爲續報閩逆情形并滿漢官兵調度事宜仰祈

睿鑒事康熙十三年四月初七日據平陽鎮總兵官蔡朝佐報稱三月二十七日酉時據防守橋墩寨千總馬寧等報稱本月二十七日巳時據分水關管隊朱祥報稱本日早晨赴桐揆聽城門甚緊止開南門二十六日城內燒燬房屋三分之一孫將官尚未歸桐吳守備在城防守過往人不許進城甚難體揆等語擬



合轉報等因又於本月初九日據金衢嚴道叅議梁萬禕衢協副將李承恩報稱康熙十三年四月初六日戌時據署江山縣事縣丞徐兆熊報稱本月初六日據解流犯快手毛老等從浦城回來口稱親見遣牌上寫總統兵馬上將軍牌行延平署延平道卽換牌上寫甲寅年仍用原條印建寧府亦寫甲寅年用本府原印二牌俱行浦城開路如路不平坦軍法從事內有云大兵所過秋毫無犯前月二十九日俱到浦城至三十日有馬兵二三十人亦到浦城縣亦屬甲寅年原印行牌備牛十隻豬四十口稻五十石柴

炭雞鵝酒伺候開路至楓嶺地方止大牌換牌俱係  
至楓嶺繳等情擬合轉報等因又於本月十一日據  
臣標中軍副將王廷桄報稱准金衢嚴道塘報內開  
本年四月初九日辰時據衢協中軍都司孫洪業報  
稱本月初八日午時據撥兵邵祿口稱揆得逆藩頭  
站李二虎帶兵一千於初六日到漁梁初七日到廿  
八都馬千總封總兵官進去迎接連夜趕出駐劄峽  
口楊把總帶兵駐劄江郎街裏面進去不得先來回  
報等情擬合飛報煩請星飛前來堵禦等情到職卑  
職隨着官兵星夜前進外理合飛報等因同日又據

金衢嚴道梁萬祺衛協副將李承恩報稱本月初七日未時據署江山縣事徐兆熊稟稱本月初六日夜據本縣揆聽快手鄭泗自江山縣南一百二十里廿八都地方回口稱廿八都馬副將於初四日早進浦城峽口馬千總初四日午後帶馬兵盔甲亦進浦城仍調各千把俱駐劄峽口大溪灘楊把總帶兵駐劄江郎街又聞得浦城北行過客說初四日初五日有兵三千到浦城船六十號裝載硝磺盔甲亦到浦城係姓江李曾三人帶來等情理合通報等因又於本月十二日據平陽鎮總兵官蔡朝佐報稱康熙十三

年四月初二日未時據防守橋墩寨千總馬寧把總田喜龍報稱本月初一日訪得橋墩本街居民翁啓辰弟翁啓和在閩生理回家寧等密喚詢問啓和口稱和自三月十二日在興化府起身十五日到省南臺見逆藩反亂本日文武各官往朝福州府官及侯官縣官不從俱被殺部院不從鎖起十六日俱割辭于十九日發兵往泉州等語擬令轉報等因又於四月十三日據衛協副將李承恩報稱四月初九日據防守常山縣把總何起先報稱揆得建寧崇安兵變俱稱藩下今廣信府鉛山縣防官汪守備領兵把住

分水關將關口壘塞以防崇安之兵理合塘報等因  
各到臣該臣看得逆賊耿精忠反叛節經提鎮飛報  
臣隨具疏上

聞一面會商調度分馳堵禦先經將軍臣圖喇發滿漢官  
兵一千名令副都統臣吳申巴都魯石調聲統領臣  
發督標兵一千名令中軍副將王廷梅統領赴衢州  
防守仙霞關常山兩路又調金華嚴州紹興嘉興湖  
州五營官兵共二千三百名赴此兩路協防其溫州  
分水關一路飭令平陽總兵官蔡朝佐親率官兵防  
守又調提標定海溫州二鎮官兵共一千名前往協

防并嚴備平陽海汛仍令溫州鎮協各營聯絡策應其處州龍泉慶元各山路飭令處州副將姜騰蛟親率官兵防守又調台州城守營官兵五百名協防其餘沿海邊汛飭令定海總兵官朱萬化黃巖總兵官阿爾泰溫州總兵官祖宏勳督率各協營俱照汛地防守但今節據撲報有賊李二虎帶兵一千先至浦城又稱江曾李賊兵三千船六十號裝載硝磺盔甲亦到浦城等語是賊勢已逼仙霞關矣又據撲報福建崇安兵變從逆江西之廣信玉山鉛山一帶未有重兵駐守常山一路竝宜亟防今副都統臣并臣標

中軍統領官兵已到衢州各營官兵陸續繼至所有塘報情形備載前疏并官兵調度事宜合先

題報但臣等惟就見在之兵隨方佈置竭力堵禦而各路兼防更無抽調之處兵馬實苦不敷懇請

皇上睿裁先調江南滿漢官兵就近赴援若候

大兵自京進發惟恐緩不及事并祈

勅江西督撫提諸臣亟發重兵謹守鉛山玉山大路以保巖疆臣謹會同浙江撫臣田逢吉提督臣塞白理合

詞密

題伏乞

皇上睿鑒施行

康熙十三年四月十五日題奉

旨兵部知道



請給官兵行糧疏

總督浙江等處地方軍務兼理糧餉兵部右侍郎兼都察院右副都御史臣李之芳謹

題爲防勦主客官兵懇

恩照例優恤以示鼓勵事據浙江布政司布政使陳秉直呈詳到臣該臣看得閩逆猖狂稱兵入犯所賴將士用命以奏成功今滿漢官兵調防堵禦在外有芻粟之需在內有室家之累月給俸餉有限不能兼顧雖効力疆場固臣子之常分而軫恤勤苦實

皇上之殊恩今據布政司詳稱順治十七年杭州駐防滿

漢官兵援剿寧波另給行糧草料其綠旗官兵馬匹  
見經川湖督臣蔡毓榮

題准照當日進剿雲貴之例支給等因臣查滿漢綠旗  
官兵行糧料草既有成例可援似應一體優恤以示  
鼓勵伏乞

皇上俯念從征勞苦准令照例支給庶官兵愈加感奮矣  
但順治十七年額定糧料與見行例不同其雲貴進  
剿之例浙省無案可考倘蒙

俞允請

勅部查明分晰滿漢綠旗官兵應加給每日米豆若干升

草若干束行<sub>臣</sub>等遵奉支給報銷<sub>臣</sub>謹會同浙江撫

<sub>臣</sub>田逢吉提督<sub>臣</sub>塞白理合詞具

題伏乞

皇上睿鑒

勅部議覆施行

康熙十三年四月十九日題奉

旨戶部速議具奏

續報各路塘報情形疏

總督浙江等處地方軍務兼理糧餉兵部右侍郎兼都察院右副都御史臣李之芳謹密

題爲續報各路塘報情形事康熙十三年四月二十四日據各營將塘報各到臣該臣看得衢州一路據塘報揆稱賊兵屯聚清湖窺伺入犯又開化縣與江西交界地方揆有山賊處州一路逆弁潛佈僞牌處協副將姜騰蛟領兵赴龍泉慶元台協都司馬登科赴景寧防守溫州一路海寇連踪突犯瑞安磐石并郡城江口各汛該鎮將放砲擊打賊船退回至泰順山

陬僻邑前據有土賊勾連海寇之報臣卽飭温州總兵官祖宏勲發兵援剿今據報援兵未至縣官防弁退回所發官兵於桐溪居中要地屯劄以便應援臣見經飛飭各路官兵協力守禦其文武官弁離城退回另在嚴查外惟是賊兵水陸交訐與賊鄰近地方奸宄乘機竊發兼以平陽兵變所備愈多一俟大兵齊集卽可星馳援剿臣思江西省城見有滿兵駐劄又有續發大兵今湖廣長沙等處見在恢復則江西已無他警伏乞

皇上睿裁

勅令江西大兵相機進剿與浙省兩路夾攻則逆賊耿精忠指日授首矣今據各路塘報情形合再上

聞臣謹會同浙江撫臣田逢吉提督臣塞白理合詞密疏具

題伏乞

皇上睿鑒施行

康熙十三年四月二十九日題奉

旨據奏沿海官兵擊退賊船奮勇可嘉知道了餘着速議具奏兵部知道

請調江南援兵疏

總督浙江等處地方軍務兼理糧餉兵部右侍郎兼都察院右副都御史<sub>臣</sub>李之芳謹密

題爲謹陳浙屬各路告急官兵調援不敷仰祈

睿鑒增調官兵分路援剿事竊惟浙閩交界衢溫處三路並有通途凡調撥官兵分頭堵禦并節據塘報賊兵圍犯瑞安景寧等處情形<sub>臣</sub>等屢次會

題在案<sub>臣</sub>欽遵

上諭公同平南將軍賴塔前去一應軍機事務商酌而行已於康熙十三年五月十五日統領本標杭協營并

江南提標官兵共一千五百名自省起行前赴衢州於途次據處協副將姜騰蛟報稱慶元調援把總韓養性奔回郡城口稱五月初八日逆賊徐尚朝帶領賊兵二千餘攻進北門縣官千總不知下落等情五月十二日龍泉兵變逼脅千總田士植往浦城投逆挾得賊兵實有二千餘由松溪壽寧浦城而來於五月十六日已犯龍泉縣官出郊迎接逆寇追印要餉百姓盡皆割辮等情五月十七日賊兵已進遂昌俱有鐵甲藤牌遂昌縣官弁兵皆出迎接今雲和松陽告急疊至各汛原無城垣可守防兵不過數十名寇



兵猝至衆寡莫敵道路不同分援莫及等情又據貼防龍游把總羅大用報稱衢協防汛千總王孝私通馬逆於五月十九日中外應合黃昏時候開城放入賊兵千數卑職帶領兵丁堵禦身負重傷至四鼓後賊仍馳往南山行蹤莫定等情各到臣該臣看得衢州爲浙閩衝要先有副都統臣吳申巴都魯等屯守郡城但一月以來賊衆四出攻掠先經常山開化防弁一逃一叛隨調副將牟大寅領兵分防今龍游逆弁又勾通賊兵入城旋復盤踞近地阻我糧道見在發臣隨帶官兵防剿其溫州一路賊兵攻圍瑞安已

及二旬副將吳三畏等悉力拒守今提督臣塞白理  
已准臣咨統兵自寧波進剿至處州一路原因兵單  
調台協官兵五百協防柰山路岐雜賊兵出沒不常  
景寧慶元失守皆因兵少賊衆而龍泉遂昌文武官  
弁皆已從逆雲和松陽見在告急臣標守備于昌祐  
又復調領官兵星馳赴援此三路情形處處緊急今  
江南滿兵雖到馬力未齊且不便零星四發臣所調  
遣以策應各路者惟有綠旗官兵如沿海諸營多調  
赴溫州一路其存營官兵又防本汛屢據瞭報賊踪  
游移提督并寧台鎮協絡繹請援難以再調金嚴二

府又皆與衢處接壤前除調撥外各營僅存兵數百  
賊氛震鄰尚慮單虛而杭紹嘉湖先經抽調見今兵  
數無多再難調發一空前臣疏請增兵雖蒙

俞允部文甫到非可一時募補足額其衢州調集之兵分  
應開常各邑見在郡城止有千計臣隨帶官兵又分  
援處州并防堵龍游臣今惟領官兵數百前進念各  
屬地方皆臣責任奈已無兵可調無將可遣兼賊勢  
猖獗而弁兵紛紛從逆事實可虞不得不據實懇陳  
於

皇上之前仰祈

卷一  
睿鑒或再發江南和碩額駙臣所統滿漢官兵或

勅江南一鎮領兵數千赴援庶可保固地方相機進剿臣

謹會同浙江撫臣田逢吉提督臣塞白理合詞密疏

具

題伏乞

皇上睿鑒勅部議覆施行

康熙十三年五月二十五日題奉

旨議政王貝勒大臣會同速議具奏

題報耿逆潛遣奸細投書疏

總督浙江等處地方軍務兼理糧餉兵部右侍郎兼都察院右副都御史臣李之芳謹密

題爲逆賊潛遣奸細投送逆書臣謹據實上

聞事臣於康熙十三年五月二十八日統兵至衢於六月初二日衢州副將李承恩口稱有要緊事面稟臣卽加詢問據稱有奸細一人持耿逆書送臣等語臣聞之不禁髮指卽令該副將立將奸細綁赴平南將軍處臣隨往會同將軍臣賴塔副都統臣胡圖吳申把都魯雅大里等公審據奸細張連進供於五月十九

日到延平府見耿精忠坐的船有一姓馬的人將耿精忠書一封王可就稟帖一封叫我到杭州與李總督我把書接了於五月二十九日到了清湖有江元勳又與我書三封叫我帶到衢州與城守副將李承恩總督中軍王廷梅西安署印知縣李爾耿精忠從延平府一日行二三十里往仙霞嶺來不知賊兵真數船隻甚多等語其逆賊耿精忠與臣書一封王可就與臣稟帖一封竝逆賊江元勳與中軍副將王廷梅衢州副將李承恩署西安縣事通判李爾各書一封公同拆閱盡皆虛張聲勢妄相煽惑之詞竊臣受

國厚恩膺此封疆重任今值逆賊犯順正臣捐軀圖報之時風夜拮据恨不滅此朝食何物背

恩反賊敢以喪心狂吹遣奸投遞臣不勝憤激卽公議將奸細張連進處斬訖臣謹據實密疏上

聞伏乞

皇上睿鑒施行

康熙十三年六月初二日題奉

旨覽卿奏擊獲逆賊耿精忠等所遣奸細并所送逆書具見忠貞可嘉兵部知道

彙報官兵堵擊情形疏

總督浙江等處地方軍務兼理糧餉兵部右侍郎兼都察院右副都御史臣李之芳謹密

題爲彙報官兵堵擊情形仰祈

睿鑒事案據溫州總兵官祖宏勳提標右營遊擊張從仁瑞安副將吳三畏嚴協副將鮑虎杭協副將陳世凱金協副將牟大寅處協副將姜騰蛟塘報各到臣該臣看得賊兵侵犯瑞安賊船在各汛江口時常飄突以圖阻我援兵屢據瞭報在案今溫州鎮總兵官祖宏勳盤石營遊擊祖應善提標遊擊張從仁寧海營



守備周成等先後擊碎賊艘餘船退泊其攻瑞之賊  
圍城已及一月副將吳三畏忠勇奮發提標遊擊劉  
國珍等並能協力率勵兵民同心固守擊斃賊衆全  
城待援實有勤勞今提督臣塞白理所統兵及在溫  
官兵共及萬餘自可解圍破賊至衢屬自江山接連  
常山開化旁出龍游并嚴屬遂安與開化比壤皆有  
賊兵出沒土寇因而附合臣密飭諸將偵探剿搜嚴  
協都司閆進等乘雨夜出擒殺賊衆杭協副將陳世  
凱等潛遣官兵擒獲偽劄賊犯又金協副將牟大寅  
報稱湖協都司姚世熙等斬賊獲械處協副將姜騰

蛟報防守青田把總陸雲龍擒賊獲械其處州一路  
先經發兵赴援并畱原調援瑞安江南官兵在處州  
協防又令黃巖總兵官阿爾泰從溫州領兵進剿并  
見發滿漢綠旗官兵赴常山夾剿俟各路捷音另行  
題報外今官兵奮勇已見先聲所有塘報情形理合上

聞臣謹密

題伏乞

皇上睿鑒施行

康熙十三年六月初六日題奉

旨據奏賊船侵犯瑞安各汛總兵官祖宏勳等奮勇擊碎

賊艘副將吳三畏等協力擊賊全城及都司閻進等擒  
賊并獲偽劄俱勤勞可嘉事平之日着從優議敘具奏  
兵部知道

常開報捷疏

總督浙江等處地方軍務兼理糧餉兵部右侍郎兼都察院右副都御史臣李之芳謹密

題爲續報官兵堵擊情形仰祈

睿鑒事案據金協副將牟大寅報到臣該臣看得常山開化與江西廣信玉山永豐等處接壤叛兵土寇勾合閩賊時時窺伺臣密飭防守協營將備嚴謹守禦先據金協副將牟大寅報稱都司姚世熙等於七都地方剿殺賊寇陣獲器械并有賊兵犯城臣隨會商發滿漢官兵赴常援剿先經

題報在案隨據該副將報稱偽總兵李雲龍率領賊衆  
四面攻圍官兵出城奮擊斬首五百餘級生擒十一  
名陣斬偽叅將張雄獲有偽劄奪獲旗幟器械并開  
列衝鋒及傷亡兵丁姓名前來查援兵未到之先常  
山防守官兵已經奮勇勦殺賊衆敗遁并防守開化  
守備黃成富報稱殺賊情形俱見將士用命理合一  
併上

聞應否議敘賞卹合聽部議臣謹密

題伏乞

皇上睿鑒施行

康熙十三年六月十二日題奉

旨據奏僞總兵李雲龍等率賊五千餘衆侵犯常山開化副將牟大寅等奮擊陣斬僞叅將張雄及賊五百餘級生擒賊衆得獲僞劄器械淡爲可嘉在事有功人員事平之日從優議敘具奏兵部知道

請用原任鎮臣李榮疏

總督浙江等處地方軍務兼理糧餉兵部右侍郎兼都察院右副都御史臣李之芳謹密

題爲特

請擢用原任鎮臣以資援勦仰祈

睿鑒事竊惟地方用兵惟在將得其人必素有威望諳練機宜始可以服軍心而振士氣俾之統率援勦著績疆場浙省原有四鎮皆爲防海而設自平陽溫州相繼變叛黃巖定海二鎮見在防禦本汛其衢州金華等處調援官兵須得大帥專一統領查有原任水師

右路總兵官李榮歷任浙省二十餘年才能素著各  
營弁兵多屬舊時部曲咸懷恩信臣叅訪輿論調至  
軍前與之商確樞密見其韜畧優長忠勇奮發熟悉  
地方情形堪當一面之寄似此威名宿將久在閒散  
淹沒可惜本官雖係降調之員但今用人急迫之際  
難拘常格臣謹特疏題

請仰懇

皇上破格擢用如蒙

俞允請

勅部議仍以總兵職銜管浙江金衢等處提調事務頒給



勅書關防俾令受事將見調嘉湖等營官兵暫令統領仍  
召募新兵以定經制查溫處額兵并援兵盡皆失陷  
是浙省經制缺額幾及一萬五千今議設援勦三營  
共兵三千名見在之兵無從抽調必須另行召募旣  
可以資戰守且使地方強壯有力之徒不致爲賊引  
誘是募兵卽所以弭盜俟恢復溫處陸續募足原額  
并聽部議其營制官員咨臣於將領之中查其功績  
量其才能酌議陞補另行題

請臣謹密疏具

題伏乞

皇上睿鑒施行

康熙十三年六月二十二日題奉

旨兵部速議具奏

密報官兵堵擊情形疏

總督浙江等處地方軍務兼理糧餉兵部右侍郎兼都察院右副都御史臣李之芳謹密

題爲密報官兵堵擊賊衆情形事康熙十三年六月二十六日據杭協副將陳世凱等塘報各到臣該臣看得溫處變叛之後賊衆由籍雲連犯永康武義官弁從賊遂直窺金華先經臣調杭協副將陳世凱到金防禦於康熙十三年六月二十二日該副將調千總景一清把總徐啓等領兵夜到武義守備任九玉等領兵接應殺敗賊衆得獲器械以兵少未能深入於

二十三日回郡平南將軍臣賴塔所調滿兵亦俱到  
金華二十四日接知有賊千餘將到郡城副都統臣  
馬哈達雅大里統領章京昂吉兔瓦星阿等並江南  
遊擊武榮臣標把總李華等前往奮擊殺賊生擒二  
十餘人追奔二十餘里得獲刀槍旗銃等件今副都  
統臣馬哈達雅大里俱准部文回省將軍臣賴塔見  
在另議調防金華但賊兵四出侵犯在在土寇竊發  
又據報間道襲破東陽臣今見在酌議官兵再往彼  
處確拔進剿外所有賊兵侵犯官兵堵擊情形臣謹  
密

題伏乞

皇上睿鑒施行

康熙十三年七月初一日題奉

旨據奏逆賊千餘侵犯金華將軍賴塔等調發滿漢官兵奮勇堵擊擒斬賊衆得獲器械可嘉在事有功人員事平之日議敘具奏兵部知道

亟請應援滿兵疏

總督浙江等處地方軍務兼理糧餉兵部右侍郎兼都察院右副都御史臣李之芳謹密

題爲賊兵分路犯衝滿師萬難分應亟懇

睿鑒以救衝疆事康熙十三年七月初五日據衝協副將李承恩報據大南門外一路揆兵莫起春報稱揆得江山來賊馬撥已至十八里地方又據大西門外一路揆兵洪大相報稱揆至航埠地方離城二十餘里鄉民紛紛逃出稱有賊三千餘人俱在河西一帶插下皂旗又據小南門外一路揆兵張自得報稱初四

半夜有賊數千從石室街來至大洲地方又揆得有賊五百餘人在九龍山又據揆兵陳龍報稱有賊二三千人從相思地方出來午時到沙埠離城十五里又據東門外一路揆兵余信報稱有賊數百人初四夜由靈山來到安仁街過河往北鄉本日亥時又據該將報稱據揆兵徐福等報稱離城十五里汪家橋一帶直至大河邊俱是賊兵屯劄至後村祝地方有逃出民人稱自江西陸續下來直至西安十八里地方沿路下營約有逆賊數萬口稱三路會兵要攻府城又據把總馬伏秀報稱前往江山一路偵揆至航

埠河東一帶見逆賊撥兵在大路下帳房三十二頂  
周圍橋園帳房皂旗甚多河西有黃心皂旗八桿紅  
月皂旗不計其數從江山間道烏石山出來絡繹不  
絕鄉民口稱約有萬餘四處催取糧草又據小南門  
外校兵宋二報稱自江山出來火器賊兵無數至石  
室街下營等情到臣據此臣隨會同平南將軍臣賴  
塔發兵出城堵禦外該臣看得衢州爲浙閩要衝賊  
以全力聚剽清湖日窺侵犯臣等時刻偵探備禦惟  
思身膺重任但當盡心竭力不敢過爲張皇激切之  
詞仰煩



三十一  
磨懷然賊兵四面而出實已危急龍游湯溪蘭谿金華等處爲糧餉要道又不得不發兵分援存衛滿兵一千有餘綠旗兵二千有餘今賊兵數道竝進臣等見在悉力堵禦專待副都統臣喇哈兵馬一到以爲聲援已經兩次行催在途今於七月初六日准部文畱駐杭州則衢州獨以滿漢綠旗不及四千之兵當逆賊數萬之衆勢必不支倘有疎虞則自衛至省順流而下不過兩三日全浙大勢不可收拾矣溫處變叛全浙門戶已失其二惟衢州尙有扼要之勢臣等於地方情形兵力多寡事機緩急無處不爲籌畫非僅以

一身所在之地爲亟今賊已合兵入犯而衢州兵力  
單寡至此若又調去應援之兵臣等雖捐糜頂踵究  
於封疆無益一面行催副都統臣喇哈星速前進外  
仰祈

皇上俯念臣等向無危迫告急之詞本是奮身不顧原非  
兵力有餘亟賜

睿裁俞允臣等所

請使不致以孤軍債事庶危疆得以保全臣謹會同平南  
將軍臣賴塔爾妥密

題伏乞

皇上睿鑒施行

康熙十三年七月初七日題奉

旨議政王貝勒大臣會同速議具奏

密報賊情疏

總督浙江等處地方軍務兼理糧餉兵部右侍郎兼都察院右副都御史臣李之芳謹密

題爲密報賊情事康熙十三年七月初六初八十三等日連據杭協副將陳世凱衢協副將李承恩嚴協副將鮑虎等報各到臣該臣看得逆賊自清湖常山各路會合逼近衢州又分賊兵襲破嚴屬壽昌淳安兼從龍游湯溪一帶河路阻絕餉道其處州之賊又間道襲破義烏窺犯浦江知縣毛文埜督率百姓殺賊全城在衢官兵陸續調往金華龍游湯溪蘭谿等處

存郡無多於七月初旬賊兵連營而進俱在十里之外將軍臣賴塔統領滿漢官兵臣統領綠旗官兵原任總兵李榮副將王廷梅李承恩都司王祚昌姚世熙守備朱知微高祿陳國任晉大忠虎邦俊隨征遊擊王世望等一齊出城堵擊直抵賊營滿漢綠旗官兵皆奮勇衝突賊營外掘深濠內列木城火器拒守官兵不能前進陣亡金協守備梁安并兵丁七人今於七月初十日賊忽棄營夜遁營內及沿途拋棄挨牌拒馬等件臣隨差守備陳國任千總滕龍等到賊剗營處所觀看營盤將賊遺挨牌拒馬木城等項逐

一燒燬訖官兵前途哨揆賊兵已望江山而去除再  
確揆情形一面調遣官兵赴近衢各山并龍游湯溪  
一帶偵揆搜勦外理合據實報

聞臣謹密

題伏乞

睿鑒施行

康熙十三年七月十三日題奉

旨據奏浦江縣知縣毛文基督率百姓殺賊全城湮爲可  
嘉着從優議敘具奏兵部知道

金衢獲捷疏

總督浙江等處地方軍務兼理糧餉兵部右侍郎兼都察院右副都御史臣李之芳謹密

題爲飛報官兵大捷事康熙十三年七月十六日據臣標中軍副將王廷梅原任總兵見在隨征李榮等各塘報到臣該臣看得逆賊各路聚合同時逼犯金衢自衢州賊兵遁回揆有逆賊一股尚在城北杜澤地方一股尚在城東南大洲地方臣等於七月十二十三等日連夜遣發官兵分路追剿都司姚世熙守備朱知微等前至杜澤地方賊兵二千有餘拒敵官兵

奮勇齊進殺賊五百八十餘人生擒二十三名陣斬  
偽副將一名獲旗械等三百餘件守備晉大忠等同  
委署衢州府知府王宏仁前至大洲地方賊兵二千  
有餘官兵奮擊殺賊六百餘人生擒五十八名陣獲  
甲仗等二百五十八件內隨征官張文福射死偽副  
將葉國榮搜獲偽諭帖偽劄驗係偽右軍都督江元  
勳所給守備晉大忠擒偽督糧遊擊龔上進知府王  
宏仁得獲偽劄一張把總曹三陽得獲偽劄一張俱  
經解臣等驗訖其處州之賊進逼金華先經官兵堵  
擊殺賊五十餘人乃於七月十三日會合賊兵萬餘



倚山列陣副都統臣吳申巴都魯統率滿漢官兵與  
綠旗官兵左右並進奮勇登山擊殺逆賊七千有餘  
生擒一百七十餘人追逐二十餘里得獲旗械無算  
內杭協副將陳世凱首先用砲打倒賊黨江南遊擊  
武榮親擒偽都督殷彪各千把等官擒獲並陣斬偽  
守備千把等共八名據偽都督殷彪供稱耿逆兵會  
合土賊共有萬餘約定要破金華等語仰仗

皇上天威滿漢綠旗官兵同心用命斬獲大捷逆賊從此  
膽寒矣臣謹會同平南將軍都統臣賴塔合詞密疏  
題報伏乞

皇上睿鑒施行

康熙十三年七月十八日題奉

旨覽卿奏逆賊兩股尚在衢州地方遣發官兵追剿擊敗賊衆擒斬偽副將等得獲旗幟器械等項具見調度有方將士奮勇可嘉在事有功人員事平之日議敘具奏金華殺敗賊衆已有旨了兵部知道

衢嚴擊賊恢復壽昌疏

總督浙江等處地方軍務兼理糧餉兵部右侍郎兼都察院右副都御史臣李之芳謹密

題爲密報官兵擊敗賊衆恢復縣城事康熙十三年七月二十二日據標下隨征福建遊擊王世望嘉興營守備晉大忠撫標守備高祿等嚴協副將鮑虎嚴州府知府梁浩然等塘報各到臣該臣看得官兵自杜澤大洲勦賊回營之後臣與平南將軍都統臣賴塔復發兵搜勦龍游之木城一帶地方隨征遊擊王世望守備晉大忠高祿等前往遇賊三千餘我兵奮勇

陣斬六百餘人生擒三十餘人餘賊奔回處州其嚴  
州一路先經副將鮑虎知府梁浩然呈首逆書隨據  
塘報賊衆萬餘先攻破開化遂破遂安兩縣官兵皆  
潰圍奔回嚴州副將鮑虎隨帶撫標援兵并回郡官  
兵先往壽昌進剿賊衆據險拒守官兵奮勇擊殺連  
奪險要隘口四處一日六戰六捷斬獲甚衆恢復壽  
昌入山搜剿賊已遠遁焚燬賊巢隨領兵前往恢復  
淳安遂安等處外所有塘報情形理合

題報其遊擊王世望等副將鮑虎等並能奮勇立功鮑  
虎與知府梁浩然呈首逆書應否議敘仰祈

睿裁臣謹密

題伏乞

皇上睿鑒施行

康熙十三年八月初二日題奉

旨覽卿奏遣發官兵搜剿龍游逆賊擒斬甚衆又嚴州副將鮑虎率領官兵奮勇殺賊連奪險隘四處一日六戰六捷斬獲甚多焚燬賊巢恢復壽昌及同知府梁浩然出首逆書俱屬可嘉在事有功人員事平之日議敘具奏該部知道

紹興仙居黃巖獲捷疏

總督浙江等處地方軍務兼理糧餉兵部右侍郎兼都察院右副都御史臣李之芳謹密

題爲彙報捷功事據紹興府知府許宏勳定海總兵官朱萬化黃巖總兵官阿爾泰各塘報到臣該臣看得逆賊於七月初旬攻犯紹屬新昌縣知縣陳大典乘間出奇殺賊全城紹興副將許捷提標守備吳良駿定海鎮標守備傅成等於郡城連日衝擊殺賊千餘陣斬僞總兵副將得獲旗幟賊衆解圍遁去其台屬仙居縣幾被賊攻破台協都司汪國祥援兵與千總

韋清內外夾攻殺賊五百餘人生擒僞都司一員又黃巖縣土寇竊發守備王有功等搜剿斬賊獲械以上賊寇多寡不同勦殺功次不等俱見官兵用命合聽部議臣謹彙疏密

題伏乞

睿鑒施行

康熙十三年八月初二日題奉

旨據奏逆賊侵犯新昌該縣知縣陳大典乘間出奇殺賊全城又紹興副將許捷等連敗逆賊擒斬僞總兵等賊衆解圍遁去仙居都司汪國祥等黃巖守備王有功等

擒斬搜勦賊衆得獲器械具見官兵奮勇俱屬可嘉在  
事有功人員事平之日議敘具奏兵部知道

李文襄公奏疏卷一終